

再者俛而窺者騰而上者如人皆具耳目口鼻而無一相似又云從靈雲寺南入山時時過絕險挽牽懸藤偃木以過日正中僅到山顛望見永嘉城下大江如牽一線白李孝光云北從天台來入古東甌郡境上望見西南有山相向立如兩浮屠遊者咸曰此鴈山門戶也益深入其阻視羅漢洞東西天柱大龍湫猶人有眉目十八步皆其肺腑也文人之所次第如此予聞之土人言秘遊鴈落有以哉南土溫溽春氣氤氲故有毒蠶至苧木黃落毒去乃可入數百里山皆在目中無毫毛蔽遮嗟乎遊貴及時也哉予將問

途焉有告余者曰鴈山循崖而南百里如畫自樂清道白河芳林適窰嶼過長嶼原經古塔本覺寶冠石門諸寺出白溪驛謂之右路自黃巖由白共嶺入石梁過雲巖逾馬鞍至能仁出長嶼抵窰嶼謂之左路馬鞍嶺蓋其分界云東谷之峯五十有三西谷之峯四十有八謂之百一峯有泉五有巖二十九有石三十三而石行廊爲勝有潭七而沐浴爲大池一澗一曰筋竹峽一曰經行門一卽石門也有洞十二而道始爲古有溪四而四溪之水爲會有嶺七而丹芳爲嶼凡四十九盤有障二而平霞爲華有橋二有嶼二

